



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 10

Election tembangba sülen sorkari ano auya tenzükogo

Madrid Open: Ashleigh Barty final-i iogo



VOL. XVIII NO. 202 (ADOK 202) DIMAPUR ROGONÜ (FRIDAY) MONUPII (MAY) 07, 2021 ₹ 5.00

Assam nung nisung 4,936 dak Covid-19 tashidak potet

Guwahati, Monupii/May 6 (Agencies): Assam nung Brehostibarnü nisung 4,936 dak COVID-19 tashidak potetba sangdongogo, aser ajak senteper tang tashi nung iba tashidak agi nisung 2,77,687 dak kongshiogo.

Kasa mapang nung iba tashidak agi taoba ghonda 24 tsüingda nisung 41 asüba sülen Assam nung COVID-19 tashidak menar asür 1,531 jungogo.

District ajak rongnung Kamrup (Metro) district nung nisung timba dak tashidak potetba sangdongogo. Iba district nung Brehostibarnü nisung 1,353 dak tashidak poteta liasü. Assam nung tang

COVID-19 tashidak menar temang anepalua alir 34,851 lir. Sample 61,377 tendangba nungi nisung 4,936 dak tashidak keta aliba jangjaogo aser Assam nung anogoshia recovery rate ji 87.50 per cent nung lir.

Bodhbarnü Assam nung Covid tashidak agi nisung 55 asü, koba state nung tang tashi nung anogo ka nung nisung timtiba asüba liasü.

COVID-19 tashidak kanga kara prokshia aoba sülen Assam sorkari Guwahati yimti kübok tesem kar mokdanga yua lir.

Item tesemtem nung temelaba agütsür aliba inyakyim kar dak alaka osang tejangja ka magütsü tashi nisungtem dena senzüsönpongsü memelar.

Dimapur nung bank ka aser ki ka shibangtsür

Dimapur, Monupii/May 6 (TYO): COVID-19 tashidak prokshiba nungi nokdangtsü aser mera balala agütsü mechi Dimapur district administration ajanga ghonda 48 atema Nyamo Lotha Road nung aliba Canara Bank Dimapur shibangtsür aser iba mapang ketdangtsürtemi bank telungzük nung mürekmejuba maparen inyaktüsü, ta sangdong ka ajanga ashi.

Deputy Commissioner, Dimapur aser DDMA

mendenpuba, Rajesh Soundararajan-isa sangdong ka nung ghonda 72 atema Oriental Colony, Dimapur nung aliba H.No. 43 shibangtsür, ta metetdaksü.

Nisung kari danga iba totuyuba nung aibelenba putetra, Disaster Management Act, 2005 kübok Section 51 nungi 60 aser IPC indang Section 188 kübok mela aliba ama temerenshi alitsü, ta sangdong ajanga metetdaksü.

Nagaland nung COVID-19 cases tasen 267 liasü, nisung asem asü

Kohima, Monupii/May 06 (TYO): Brehostibarnü Nagaland nung nisung tasen 267 dak COVID-19 puteta state nung tang tashinung iba tashidak agi nisung 15,271 meneper alitsü, ta health ketdangtsür kati ashi.

"Tanü nisung 267 dak COVID-19 putet. Kohima nung 130, Dimapur nung 117, Mokokchung nung 7, Tuensang nung 7, Phek aser Zunheboto nung ana-na, Longleng aser Mon nung ka-ka. COVID-19 agi menepa alir nisung 38 taneptsü nguogo. Dimapur nung 21, Kohima nung 9, Tuensang nung 7 aser Mon nung ka," ta Health Minister S Pangnyu Phom-i

Twitter nung sangdong.

Iba caseload nungya taneptsü ngur alir nisung 12,428 aser tang active 2,245 lir, ta pai ashi.

State nung COVID-19 nungi taneptsü anguba ya Bodhbarnü shilem 82.57 liasü aser Brehostibarnü shilem 81.38-i alu, koba March 19 nü shilem 97.98 liasü.

Tanü nisung asem asüba ajanga state nung iba tashidak agi asür nisung 121 ajunger, aser item rongnung nisung 10 asüba nung danga tashidak dena lir, ta pai ashi.

COVID-19 alir nisung 477 tashi danga state temi ogo, ta Minister-i tweet asü. Kasa mapang Nagaland nung Brehostibarnü tashinung nisung

1,75,398 nem COVID-19 mozü dosen 2,22,763 agütsüogo, ta State Immunization Officer, Dr Ritu Thurr-i ashi.

State nung iba mozü agir alirtem rongnung frontline worker nisung 51,291, healthcare nung inyaker nisung 14,979 aser arishi küm 45 nungi tema aser teintet rogo nisung 1,09,128 alitsü, ta pai ashi.

Nisung 47,365 nem COVID-19 mozü doses tanabuba agüja parnok iba vaccination course temogo. Parnoki frontline worker nisung 26,272, healthcare nung inyaker nisung 9,955 aser arishi küm 45 nungi tema aser teintet rogo 11,283 alitsü, ta Dr Thurr-isa ashi.

Government, Principal Director (Education) Shanavas C, Dimapur nung aliba IAF project office, Head Quarter Eastern Air Command Shillong, Air HQ (VB) New Delhi aser Ministry of Defence tsüingta amalitep tajung aliba ajanga mapang shidak nung aibelen mesüi nungdakba osettem tayimtsü nung bener arur, ta osang ka ajanga ashi.

Taoba mapanga IAF ajanga state sorkar nungdakba mapang bendanga agütsür yaria arur aser anentsüh aliba mesüra morok mi adokba mapanga tayimtsü amshia civil administration yaria arur.

IAF ajanga Ahmedabad nungi Oxygen plant oset bener arutsü

Dimapur, Monupii/May 06 (TYO): Nagaland nung oxygen plant amenoktsü atema kanga nungtaka aliba Compressor aser oset tanüingba kar Indian Air Force (IAF) ajanga Ahmedabad nungi Alahabad ajanga bener arua liasü. Iba plant nung nungdakba oset tulutem taoba hopta Delhi nungi Chandigarh nung amenoka aliba IL 76 aircraft ajanga bener arua liasü.

Oset tuoozüük ton asem shi EAC Chumukedima Er Seyie Solo nem May 6, 2021 nikongdang 2:00 ako meta amoktsüogo, shiba Dimapur Airport indang Coordinating

Officer lir. Item oset ya maneni lenmang ajanga Dimapur aser Mokokchung-i bener aotsü. Iba mapa inyaktüsü ya IAF indang AN- 32 medium lift transport aircraft nem nunglokja liasü, koba Jorhat nung amenoka aliba 49 Squadron indang lir. Taoba küm tashidak wara tenzükba sülen IAF ajanga Nagaland sorkar yaria COVID-19 dak sendakba tongtipang osettsüset ton 96 shi bener arutsüogo aser tanü tashinung special airlift mission 13 ajunger, ta sangdong ka ajanga ashi.

State ketdangtsür, Nodal officer for Airlift of State

Government, Principal Director (Education) Shanavas C, Dimapur nung aliba IAF project office, Head Quarter Eastern Air Command Shillong, Air HQ (VB) New Delhi aser Ministry of Defence tsüingta amalitep tajung aliba ajanga mapang shidak nung aibelen mesüi nungdakba osettem tayimtsü nung bener arur, ta osang ka ajanga ashi.

Taoba mapanga IAF ajanga state sorkar nungdakba mapang bendanga agütsür yaria arur aser anentsüh aliba mesüra morok mi adokba mapanga tayimtsü amshia civil administration yaria arur.

Government, Principal Director (Education) Shanavas C, Dimapur nung aliba IAF project office, Head Quarter Eastern Air Command Shillong, Air HQ (VB) New Delhi aser Ministry of Defence tsüingta amalitep tajung aliba ajanga mapang shidak nung aibelen mesüi nungdakba osettem tayimtsü nung bener arur, ta osang ka ajanga ashi.

Taoba mapanga IAF ajanga state sorkar nungdakba mapang bendanga agütsür yaria arur aser anentsüh aliba mesüra morok mi adokba mapanga tayimtsü amshia civil administration yaria arur.

Fazl Ali College tasemben NAAC kübok accreditation jenjang angutsü tera arentaker

Mokokchung, May 6 (TYO): Mokokchung Press Club-i May 6 nü lokti tebilemtsü (social concern) ka ama Chuchuyimpang lushi nung aliba Fazl Ali College (FAC) semdanga yangji ketdangtsüri anir tesayur aser kaketshir lenirtem den sensaksem tajung ka aka.

Iba sensaksem akaba mapang tesayur o kaketshir na tsüingda tesentaktep aser shisatsü sayuyim balala den college nung tawa tanü terenlok mapa inyakbatem aser ano tarutsü nung inyaktüsüba mangdang aser inyaka aoba mapang tsükdakrang ajurubatem aika angazüka liasü.

FAC ya Nagaland nung tejentiba college lir, ibai 1959 küm tenzük aser iba ya tenzükdang Aor kilen shia sen sarutepba par college otsü nung angur. FAC tenzük küm 60 tema arudang iba college nungi lenmang balala nung nungtugu nisung aika adokogo. Iba college memeteter aikabo mali. FAC ya shisaliok angazükdak tesem ka asütsü koda tajung. Amokmolu awatsüing anasa, asayadak moapu tesatem, benjabeno mali jangratemtsü.

Iba riju tenzük küm 50 ajungba nungtem National level nung college ka ta züingoktsü atema 'accreditation' jenjang atema meranga liasü aser tia junga Nagaland nung Govt. College rongnung mezüingbuba National Assessment and Accreditation Council (NAAC)-i 2009 kümto FAC nem 'B' Grade (CGPA 2.29) jenjang agütsü. Tanabena 2015 küm asadanga mapanga 'B' grade (2.5) sa angutsü aser taküm 2021 ya NAAC ajanga tasembenbuba asadangtsüba küm lir. NAAC ajanga accreditation' jenjang agütsüba college-tem küm 5 nung khen asadanger. NAAC-i aginüba ama tajungba küm lira jenjang tajungba agütsür mesüra tamajungba küm lira jenjang ajemdaksür aser kanga mejungi alirtembo accreditation' ji agienatoker. Aji NAAC inyakyim lir. Tang NAAC-i tasembuba asadangtsüba yabo tera balaka asütsü ta arentaka bilemer, kechiyong FAC purji NAAC-i aginüba ama mapa aika renema maliba angur aser college nung inyakertemia tera rataa bilemer.

Ministry of Human Resource Development (Govt. of India)

kübok Rashtriya Uchchar Shiksha Abhiyan (RUSA) mapatong ajanga taoba mapang sen crore 3 arua 2018 küm FAC nung mapatong 2 inyak. Mapatong ka vocational nung amshi aser kaji college terenlok mapa nung amshi aser iba jagi Network Resource & Computer Centre ta sür ki asem amentepba ka asü. Iba kiji tsüinglangba (basement) taktang dak alaka tanga temaba kitem (storey) anajibo mopung arudak kijiba (ventilation) maliba ajanga mamshitetter, ta angazüker. RUSA ya higher education jenjang ajungkettsü atema state dangi yokba Centrally Sponsored Scheme (C.S.S.) ka lir.

Ano tanaben RUSA küboksa 2019 küm college terenlok mapa inyaktüsü atema sen crore 2 aru aser mezüingren (1st installment) jagi ki asütsü tenzükba tang tashi merenemteter. Iba kiji süzüük nung dang NAAC ajanga teinyaktüsü agütsübatem inyaktüsü jenti lir, saka tang tashi kiji merenemteter aser yaktabo merenemtetsü ama angur.

Angazüka agi RUSA nungi senji mezüingbo FAC Account-i ait saka ano Department of Higher

& Technical Engineering Wing dangi iba senji yokang (transfer asütsüla) ta department nungi order ka aru. Anungji, college-i iba senji Engineering Wing dangi transfer sütsü, ta osang tejangja kar ajanga angazüker.

Fazl Ali College nung jangratemtsü ka reprangtetebaji; Chuchuyimpang Village Council-i tang FAC campus nung Aor Arju ka yanglutsüdar. Iba Arju nungi akhi tsüraburi inyaka aruba teka mapa balala den otsüolem aser kentenmenü tapu balala aser Naga nung sobaliba wazüka ayuba maparen jenti kaketshirtem nem angazükdaksütsü par nükjidong lir.

Ano jangratemtsü rongnung kaji; alima kecha nunga maliba ka FAC nung lir, ibaji kechi ta süra, 2014 August nungi FAC nung Ao Oshi (MIL) agir. Iba mapa ya tenzük joko taküm August nungi tenet (7) abensatsü. FAC nung Ao subject ji Major/ Honours subject ka ama agitettüsüa tang mapa teinyakdak lir, ta angazüker. Osang tajung kaji memunui FAC nung Ao Language translation centre ka lapoktsü achayangdar. Itemji lapokba ajanga Ao kaketkeno

asur oshiooben renlokba den lenla aisü nung tajangzüksü angutsü imlar. Idenji FAC library nung Ao Literature section tenzüktsü atema Mokokchung Village Council-i sen tenla tulu agüja lir, ta angazüker.

Iba den FAC atema nisung kari tenla agüja tangji solar light 10 KW inokdar, student database den office management system aser learning management system-tem digitalization kümdaksütsü inyakdar, library computerized asütsü maparen tenzükogo, yakta Botanical Garden ka tenzüktsü aser Digital Auditing Vide Tally Software amenoktsü merangdar. Tawa to Principal's chamber, visitor's lounge, H.A Chamber, Accounts & Establishment room tasen renemogo aser ano college nungi terenlok maparen tapu jenti inyaka aoba angur. FAC ya tarutsü nungbo course tapu balala agütsüba multidisciplinary institute ka kümdaksütsü par nükla lir aser jokola iba atema maparen tenzükatokogo aser iba mangdang nungi parnoki nübur nungi lenla balala nung teyaritpek akhanger.

Peren district nung aluyimertem nem machine balala agütsü



Land Resources Department Peren-i, May 6 nü ADC Jalukie, Dr. Tinojongshi Chang matsüngdang beneficiaries 15 nem Rubber Sheet Roller aser beneficiaries 15 nem Coffee Pulping Machine agütsüogo.

Dimapur, Monupii/May 6 (TYO): Local coffee ajungkettsü aser productivity aser sustainable farming ajungkettsü atema aluyimertem ajungmesotsü asoshi Department of Land Resources, Peren-i May 6 nü DPO Office, Jalukie nung sentong ka ayongzüka agiogo. Iba sentong nung Peren district nung aliba aluyimertem nem Rubber Sheet Roller machine 15 aser Coffee Pulping machine 15 agüja liasü. Iba project atema North East Council (NEC)-i senotsü teyari agüja liasü.

Sentong nung alakteta jaoker ama Dr. Tinojongshi Chang (NCS) ADC, Jalukie-i aluyimertem nem machine tem lemtsü. Rubber aser Coffee tsünütsü atema Peren district

nung tsüingsang mopung kanga tapet asünung iba tesem nung Rubber aser Coffee na kanga junga tsünüa arutsü atema lenmang sadema lapoka lir, ta pai ashi. Paisa, local rongsenketsüing ajungketa nüburtem libaliro tajungba kümdaktsütsü atema sustainable crop ama Rubber aser Coffee tsünütsü koda tongtibang iba indang lemsatöp.

Paisa, aluyimertem dang telong junga tsünütsü aser parnoki tsünütetbatem alima nung tesem balalai yoktsü atema inyaktsü ajungshi. Department-i aluyimertem renemtsüba aser parnok nem maneni teyari agütsüba den shisatsü tajung agüja maparentem tatongi benoka inyaktsü atema len sayuba atema ADC-i department

nem tenüingsang agütsü.

Kasa mapang nung Land Resources Department, District Project officer, Alemla Aier-i, Peren district dang ya 'the Green District of Nagaland' ta ajar koba arem min agi meketbanga lir aser lisa kanga tebor tajung ta ashi. Laisa, aluyimertem dang tangari tatishitsü tajung agütsüa nükjidong ayutsü aser tsünüsenpongtstütem telongjunga tsünütsü atema ajungshi. Maneni Alemla-i ecotourism ajungkettsü aser peisasa aayanga chiyongtsü atema lenmang sadema lapoktsütsü ajungmeso, ajita asü nung dang rongsen timba azüktetsü, koba yimdaklirtem dangi indang indanga aotsü, ta ashi.

Ex-minister aser NPCC tatong tir Khutovi Sema süogo

Dimapur, Monupii/May 06 (TYO): Ex-minister aser Nagaland Pradesh Congress Committee indang tatong tir, Khutovi Sema, mapang talangka shiranga arur Brehostibarnep Eden Hospital, Dimapur nung süogo.

Pa ya state sorkar tenzüikba wadang nung Department of Wastelands Development indang Director ka ama mapa nungi anisüngzüka liasü. Pa 2003 küm yimtenren tsütsü tetsüing ajemok aser 33 Suruhuto Assembly Constituency nungi Independent candidate ka ama shimteta Minister, Roads & Bridges inyaka liasü.

2008 küm pa Indian National Congress nung tenüing züluok aser tasünü tashi pa iba party nung liasü.

Khutovi asüba atema NPCC ajanga asükhü lemsatöp aser putu tejenba nungi lenir ishika anünga aliba nungi pa ka liasü aser parnok amala nübu tejen aliba ajanga lanurtem len ania aru, ta ashi.

Party mapa nung pai bendanga agütsür manokshie nokdaka aru aser pa asüba ajanga Congress part worker tem temolung nung kongshir, ta NPCC sangdong ajanga ashi.

Mangyimer kibong den asükhü lemsateper aser mangyimer nem tashi tasen aser temolung sunepsüba agüjjang ta sarasademtsür, ta sangdong ajangasa ashi.

Mapang talangka shiranga arur tanep Eden Hospital, Dimapur nung Khutovi Aye asüba osang angashia temolung



khurema jashir, ta Minister aser BJP Nagaland tir Temjen Inma Along-i sangdong ka nung ashi.

Khutovi Aye ya tejangja nübu ka liasü, shiba minister inyaka liasü aser Land Resources Department nunga Director tongteta inyak. Ajemalur aser dangar dak aria bilemba lenir, shibai pei kin atema kisüing masü saka Naga nunger ajungkettsü asoshi tajungtiba nung tenzüka liasü, ta Minister Inma Along-i ashi.

Pai tanurtem Tsüingrem tsüpuba nung anitet aser pa ya Medical Cell, BJP Nagaland indang Convenor, Dr. Akaiho Aye tebu lir.

Pa asüba ajanga tawa tuluka adokogo saka pai mapa tajung inyaka yutsüba asen molung nung teti alitsü. BJP Nagaland nung inyaker ajungai asür Khutovi Aye'er kinungertem den asükhü lemsateper, ta pai ashi.

All India Professionals' Congress (AIPC) Nagaland-ia sangdong ka nung NPCC vice president aser Ex-minister Khutovi Sema asüba osang angashia aoksar aser kanga

asar, ta ashi.

Jenang balala nung nübur tenzüka wadang nung pa takum bendanga agütsüogo. Ken o balala nung pai aria bilema, osü tanük aser yimya tajung amshia jembia aru. Pai party asoshi anibelem mesasai inyakba teti bilemtetsü, ta sangdong ajanga ashi.

Asür kinungtsü Hutoli, chirnurtem aser kinungertem den AIPC ajanga asükhü lemsateper aser pa tanünga teti tatem maka tesunep nung anisüngzükjjang ta sarasademtsür, ta AIPC, Nagaland tir Pretso Therie-i ashi.

Taoba mapang Director (Westland) aser Ex-Minister Khutovi Aye asüba osang angashia NSCN/GPRN (Reformation) indang vice president, Akato Chophi-i mangyim tejashi den asükhü lemsatepa liasü.

Yehemi yimtsüing nungi asür Hozhushe Aye'er jabaso asür Khutovi Aye ya mezüing graduate asürtem rongnung ka lir, shiba Bhubaneswar nungi degree nguteta liasü. Pa ya wadang aika nung mezüingpur aser samanir liasü, shibai sorkar ketdangsuba aser yimsüsüba tsütsü tsüingnep tajung yutsüogo, ta sangdong ajanga ashi.

Pa asüba ajanga anük-apang tajung ka aser külem tasü-tait senso ka samaogo. Pa asüba ajanga temolung shiranger aser Tsüingremi pa tanüla teti tatem maka tesunep nung anisüngzükjjang ta sarasademter, ta Akato Chophi-isa ashi.

Kohima DC-i tenokdangba agütsür

Dimapur, Monupii/May 6 (TYO): Deputy Commissioner & Chairman, District Task Force Kohima, Gregory Thejawelie-i sangdong ka ajanga, May 4 nü pa office ajanga sangdongba aser Home Department-i April 29 nü osang

agütsüba dak ajemdaker maneni Kohima district nung osang tejangja ka magütsü tashi tekülemdak balala nung nüburtem adenshiba densema lokti senden agütsü asoshi tenokdangba agütsüba nenshia metetdaksüogo.

Kohima Municipal Council-i metetdaksür

Dimapur, Monupii/May 6 (TYO): Kohima Municipal Council, Administrator, Kovi Meyase-i sangdong ka ajanga, BOC (T.Khel & Mao markets) nung amenoka aliba shishilembadak aser High School nung shishilembadak May 6 nü nungi tenzüka osang

tejangja ka magütsü tashi shilem 50 dang lapoktsü tetuyuba agütsüogo. KMC office-isa tanga shishilembadak asadanga alitsü aser nüngdak dang süra kasa tetuyuba agütsütsü, ta kasa sangdong ajanga metetdaksü.

May 10 nü Wokha DPDB senden agütsü

Wokha, Monupii/May 06, 2021 (TYO): Vice Chairman District Planning and DPDB Wokha aser Deputy Commissioner, Orenthung Lotha-i sangdong ka ajanga DPDB züingsem ajak dang Hombar (10.06.2021) anepdang 11:00 meta Deputy Commissioner Conference Hall,

Wokha nung ita shia agiba District Planning and Development Board (DPDB) senden amentsü, ta metetdaksür. Anungji, iba senden nung züingsem ajak medema aruagi adentsü asoshi mepishir, ta kasa sangdong nung shia lir.

LRD-i Wokha nung Coffee Pulper Machines 52 lemtsü



Dimapur, Monupii/May 6 (TYO): Department of Land Resources-i May 6 nü District Project Officer, LRD Wokha indang office nung district nung coffee tsünertem nem Coffee Pulper Machines lemtsüogo. Iba sentong nung Deputy Commissioner Wokha, Orenthung Lotha alakteta jaoker liasü.

arua jembia. Paisa district nung department dak sendakba tanga inyakyimtem tajungba benoka aotsü atema shisatsü lemsateptsü ajungshi.

Sentong nungsa DPO Wokha, LRD, Tepunol Yore-i, Wokha district nung yimtsüing 68 nungi kibong 568-i ali hectare 684 nung coffee tsünüa lir ta ashi. Paisa, yimtsüing 46 nungbo tejang atang tenzükogo, aser iba tetezü district kübok ali hectare 206 nung tejang atang tenzükogo, ta ashi.

North Eastern Council (NEC)-i senotsü teyari agüja aliba coffee pulper machines 52 district kübok coffee tsünürtem nem agütsüogo. Sanis nungi Thunjamo Erui aser Wokha yimtsüing nungi Zubenthung Murry nati parnoki tajangshibatem lemsateper aser beneficiaries tem tenüing nung department nem tenüingsang agüja liasü.

Wokha ya peria aliba lima ka ta shia pai, 2020 küm wara poktetba ajanga state mokdanga ayuba mapang District Task Force tenüing nung Kohima aser Dimapur district-i Wokha district nung tsünütetba aonsotsü aser süngjanglijangtem aika bener yokoba tatishitsü ka bener

Maneni WDTm Wokha, David Odyuo-i, coffee tsünertem dang department-i agütsüba machine tem tajungtiba nung amshitsü aser tarutsü tajungba ka atema department den teka amteper inyaktsü ajungshi.

Arunachal nung doctor tem anogo ana longkak aittsü



Itanagar, Monupii/May 6 (Agencies): Arunachal Pradesh nung doctor tem Hokolbarnü nungi tenzüka anogo ana mapa minyaksü atema renemer lir.

Doctor tem longkak aiba sentong ya May 7 anepdang 6 ako nungi tenzüksü aser May 8 nikongtsütsü 6 ako nung tembangtsü.

Ajisüaka emergency services dakbo mekongshitsü.

Kasa mapang nung longkak aiba mapang doctor temi COVID-19 agi shirangertembo maneni anepalutsü.

Itanagar Capital Region kübok Naharlaguntesem nung amenoker aliba Samaritan Hormin Hospital nung nisung telok kati doctor ana tepsettsü merangba anema Arunachal Pradesh nung doctor temi longkak aittsü atema

telemetba agi.

Samaritan Hormin Hospital nung tetsür ka COVID-19 tashidak agi asüba sülen tetsürla anepalurtem telok kati doctor ana dak teka sangshia liasü.

Kasa mapang nung item nisungtem yagi mozükidang osettsüttema raksatsü.

Doctor ana ya Dr Tabu Muri aser Dr Nabam Jadav ta jangaogo.

Doctor ana amakba aser mozükidang osettsüt raksatsüba dak sendakba nung Indian Medical Association-Arunachal Pradesh branch (IMA-AP), Arunachal Pradesh Doctors' Association (APDA), Indian Dental Association-Arunachal Pradesh branch (IDA-AP) aser TRIHMS Faculty Association-i Bodhbarnü iba inyakim aitsüogo.

"Itanagar Capital Complex nung doctor tem ajak Emergency aser COVID-19 duty dak akala anogo ana (Hokolbarn aser Honibar) mapa kecha minyaksü. Doctor ana tepsettsü merangba aser mozükidang osettsüt raksatsüba anema May 7 nü anepdang 6 ako nungi May 8 nü nikongtsütsü 6 ako tashi doctor tem longkak aittsü," ta IMA-AP-i ashi.

Samaritan Hormin Hospital sangdong ka ajanga ashiba agi, asür kinungertemi tetsürla asüba indang rasaa ashiba angatsü memulungi liasü aser parnoki mozükidang osettsüt raksatsüba den doctor aser staff tem dak teka sangshi.

Arunachal Pradesh State Commission for Women (APSCW)-i, Naharlagun kübok Hormin Hospital nung tetsürla asüba osang süoki ia agiogo. Par kinungertemi ashiba agi, la temang shidak anepalu masüba ajanga asü.

APSCW-i tetsürla asüba osang angazüka asükhu lemsatepba den Itanagar Capital Complex SP dang tebandang kecha makai iba ken o bushitsüngdangtsü atema asüngdangogo.

Mizoram nung nisung 172 dak COVID-19 tashidak potet

Aizawl, Monupii/May 6 (Agencies): Mizoram nung taoba ghonda 24 tsüngda nisung 172 dak Covid-19 tashidak potetba metetdaksüogo.

Brehostibarnü tashi nung Mizoram nung ajak senteper nisung 6,964 dak tashidak potetba sangdongogo aser kasa mapa nung nisung 5,305 anepogo.

Mizoram nung tang nisung 1,642 COVID-19 tashidak agi tonger temang anepaludar aser iba tashidak agi nisung 17 süogo.

Nisung 172 rongnungi 71 Medical College (ZMC) nung RT-PCR tests ajanga tashidak keta aliba jangja aser tanungba nisung 98 Rapid

Antigen Test (RAT) ajanga tashidak keta aliba jangjaa liasü. Kasa mapang nung nisung 3 TrueNat tests ajanga tashidak potet.

Mizoram health minister Dr R Lalthangliana-i, COVID-19 tashidak keta alir tali potetyonga aoba den facility agi anüngba ajanga state lendongbang nung lir, ta ashi.

Taküm küm April ita nungi tenzüka Mizoram nung COVID-19 tashidak keta alir tali küma odar, aser iba ajanga tashidak azüoktsü atema state sorkari tenokdangba balala agütsüsüsa aküm, ta pai ashi. "Northeast nung tang

COVID-19 infection rate dak sendakba nung Assam sülen Mizoram tanabuba jengang nung lir. Onok dang lendongba nung lir aser yamai dang ora tensa azüoktsü atema tasak akümtsü," ta Lalthangliana-i ashi.

Minister-i ashiba agi, lokti nung tashidak kanga kara menatepyonga odar aser yim dak yimtsüngtema kümzüka mali.

Maneni pai nüburtem dang tetuyuba balala agütsür aliba sülen tashi angaa anidaktsü, lokti nung tetsüngda ita inyaksangshitsü aser tanga COVID-19 inyakim tem sülen tashi angaa anidaktsü mepeshia metetdaksüogo.

बैंक ऑफ बड़ोदा
Bank of Baroda
India's International Bank
Regional Office, Jorhat,
Crystal Enclave, Seuni Ali, Borpool, A T Road,
Jorhat-785001, (Assam)

Bank of Baroda-i, Naginimora, Nagaland State Naginimora Branch atema power shidak den facility ajak aketba Diesel Generator ka asoshi offer invite asür. Offer agütsürtemi parnok indang offer sealed cover super scribed Technical bid aser Price bid balala ana Assistant General Manager, Bank of Baroda, Jorhat Region, Crystal Enclave Seuni Ali Borpool Jorhat-785001 nem 27.05.2021 nü mesera iba anogo matongdang agütsüsüla. Osang tejangja agitsü atema website www.bankofbaroda.com semdangang.
Kuli kecha magütsü bank-i offer agzüksü aser magizüksü temeden lir

Place :- Jorhat
Date :- 07.05.2021

Sd/- Assistant General Manager
Jorhat Region

BJP-i minority cell loksatsü

Guwahati, Monupii/May 6 (Agencies): Tawa tembangba Assam Assembly elections nung Muslim nungeri amokbanger aliba constituency tem nung party-i junga shilem magiba sülen Assam BJP-i item tesemtem nung minority cell loksatsüogo.

Party indang minority cell loksatsü atema Assam State BJP tir Ranjit Kumar Dass-i tetuyuba agüja liasü.

Ranjit Kumar Dass-i agütsüba tetuyuba nung, Assam BJP minority cell mapang telatetka makai loksaja atatsü, ta shia lir.

Temetettsükaji Muslim nungeri amokbanger aliba constituency tem nung BJP aser parnok den lokteper aliba party temi menden ka nung danga takok mangu.

Taküm Assam Assembly election nung Muslim nungeri MLA 31 shimogo, saka parnok rongnung BJP mesera parnok

den lokteper aliba party tem nungi ka danga mali.

Assam Assembly election nung shimba Muslim nungeri MLA tem ya Congress nungi 16 aser AIUDF nungi 15 lir.

"Onoki imlaba dang nungi item tesemtem nung vote ishiba angu. Booth committee züngsemtemia BJP nem vote magütsü, anungji maparen maneni inyakyonga aotsü nüngdak madoker," ta Assam State BJP tir Ranjit Kumar Dass-i ashi.

Muslim nungeri amokbanger aliba tesemtem dak alaka BJP aser parnok den longjemer aliba party; AGP aser UPPL nunger tanga constituency tem nungbo takok tajung ngua menden 75 koktetogo.

Kasa mapang nung Congress-i aniba Grand Alliance-i menden 50 koktetogo, kong Muslim nungeri amokbanger aliba constituency tem nungi menden 31 akokba densema lir.

Taoba Union Minister Matang Sinh COVID-19 agi asü

Guwahati, Monupii/May 6 (Agencies): Taoba Union Minister aser Congress lenir tejen Matang Sinh COVID-19 tashidak agi süogo.

Matang Sinh ya arishi küm 58 tain liasü. Pa Brehostibar anepdang Delhi nung mozüki ka nung asü. Sinh dak April 22 nü Covid-19 tashidak keta aliba poteta liasü.

Matang Sinh ya taoba Ato Kilonser PV Narsimha Rao den teyariteper ka liasü aser Rao lenisüba kübok pa union minister ama inyakogo.

Kasa mapang nung Matang Sinh ya Assam nung TV tycoon ka ta ajaki jangjaa liasü.

Matang Sinh-i, 2003 küm Northeast nung mezüngbuba satellite news channel- Northeast Television (popularly know as NETV) amenok.

Pa 1992 küm Assam nungi Rajya Sabha züngsem ka ama shim aser 1994 nungi 1998 tashi union minister of state in parliamentary affairs mapa belenzüka inyak.

Sinh ya 1962 küm Tinsukia nung aso.

2015 küm January 31 nü pa CBI-i apu. Pa criminal conspiracy, tangar ashiooktsüba aser Saradha Chit Fund scheme nung sen crore 28 mashiymi amshiba atema aija apu.



Mizoram, Champhai district kübok Indo-Myanmar arrtsü anasa Zokhawthar-Melbuk lenman nung Assam Rifles aser excise & narcotics department-i Bodhbarnü heroin gram 57.4 puogo. Temesepba mozü ya sen lakh 22.96 alang liasü, koba Myanmar nungi shibelener aruba lir. Shibelensang aser pai bena aliba temesepba mozü ya excise and narcotics department nem bendanga agütsüogo, ta AR ketdangsur kati metetdaksü.

INPT aser TIPRA na longjemogo

Agartala, Monupii/May 6 (Agencies): Indigenous Nationalist Front of Twipra (INPT) aser Tripura Royal Scion Pradyot Deb Barman-i aniba TIPRA (Tipraha Indigenous Progressive Regional Alliance) na longjemogo.

Iba osang ya INPT tekolakba BK Hrangkhawl aser Pradyot Deb Barman nati külem sangdong ka ajanga Brehostibarnü Agartala kübok Ujjayanta Palace nung osangbenertem den sensaksemba

metetdaksü.

Temetettsükaji tawa tembangba Tripura Tribal Areas Autonomous District Council (TTAADC) elections nung TIPRA aser INPT na longjemer toktepa liasü.

TTAADC election nung menden 18 akokba sülen party ana longjemer TTAADC nung sorkar kümtetogo.

"Greater Tipraland ajanzüksü atema party ana longjemer ka kümogo," ta TIPRA mendenbuba Pradyot Deb Barman-i ashi.



TIR YIMYIM YIMOBILEM (EDITORIAL)

DIMAPUR ROGONÜ, MONUPII (MAY) 07, 2021

Asenok mozü ki koma lir ?

Tangbo Covid-19 tashidak ya mopong nung senzür asünungji, kanga kümdanga kechalenia maokidang amongyonga odang menar aser nisung aika shirangadoker, anungji yamaji ka asen daka ataloknunga kong koma oagi anepaludaktsütsü ta bilema renemtsüba mapangji tang ya lir. Joko, tangbo India nunga yimitem aika nung mozü kidang yipten agi maku kümogo aser oxygen dang masü saka mozüa dena mangur. Kasaji asen lima nunga Dimapur nungbo Covid mozü kidang shiranger agi süngadokogo. Iba ama lendong mapang kati asenok menepa arudang, asenokbo meshirangtsü aser masütsü ama bilemra, ajibo asenoksasa asenok ashioksür asütsü. Atangji, yimra agi atong ama temang meshidaki kümra, akok tashi tamasayongi mozü kidangi moi kidang peisasa pei temang anepalu ashitsüba kanga tongtibang kümogo. Ajisüaka, kidang anepalu mesütetsüsa shirang nungbo, onü mounü ta masü saka mozü ki bushitsüsa adoktsü, anungji asenok oa anepalutetsüsa asenok aotsüba mozü kiji tang kechikoma tia ka nung lir ta karibo oagi reprangdanga anepalutsüla. Tang yabo tanga tashidak amato masü saka wara, anungji mekümdangra asenok ajak khen nung zükoktsü. Aji oda, asen alidak kenü nung shiranger noklang junga mozü ki ka nung amongtsüsa adokra, koma asütsü ta shisabolua bilema yimsüsür aser medical nung ketdangsertemi anir lokti aser arogo lenirtemi pei pei district, pei pei constituency aser pei pei tesem nung lapoka aliba mozü kitem tia aser jenjang reprangdanga renemshitsüba kanga rongdak nungdak kümogo. Joko, yipten noklang ka aliba mozü kidang nisung noklang anabo, yipten 50 aliba mozü kidang noklang kabo aser yipten ter aliba mozü kidanga yipten metsübo yur nisungtem anepalutetsüsa, government-i magütsüetra, arogo senpong nungi dena agiteta renemtsüla. Kong aser koba mozü kidang südirsüaka, doctor aser nurse-tem kwi yoka ali, item ajakji shitak pei inyaksü yokba mozü kidangji alitsüla. Covid agi shirangertem aika tashidak mesen tepokbok nung atemba agi tango mesashiteta akümer, anungji oxygen nungdaker, anungji oxygen agi meperia ta masütsüsa, government-i magütsüetra, itemjia arogo shiai pei pei tesem nung lapokba aliba government mozü kidang ayutsü atema oxygen cylinder aser oxygen concentrator karbosa tenla agütsütsüla. Oxygen cylinder-ji oxygen yangludak bener oagi enoker bener arutsü saka ano Oxygen concentrator-jibo refill asüi aotsü menüngdaker, iba machine jagibo pasasa mopong tajungji atsür arua agi agütsür, anungji ajisa tajungba ta ashir. Item mapa nung mongintemi ashiba agi, iba oxygen concentrator-ji ka nung sen meyirijang roker - neter shi kati angutsü. Ibaji arogo tuluibo ter metsüa alia agütsütetsü aser arogo tilaia kabo mesüra anabo agütsütetsü. Mozü kidang amshitsüba yipten süli, cylinder süli mesüra oxygen concentratorji süli, kodang asenoki tenla agütsür, itemji tangar asoshi masü saka asen asoshi agütsür ama bilema agütsütsüla, kechiyong metsümetsüi ibaji asenang agitsüsa adoktsüa akok. Joko, tangar Sikh nunggerbo parnok lokti tekülem ki agi mozü ki kümer, yangji oxygen concentrator-temji yur Covid agi shirangertem yari tenzükogo. Yaküm küm Covid-19 agi amokmerendanga, tasü mang bener oa entoker mali timtemba mapang, Sikh nungertemiang item mapaji mulungsua inyakba asenoki nguogo. Iba amaji asenoka tashidak wara agi shirangertem anepaludak maka aküm nungbo, asenok tenla ki agi mozü ki kümer yariteptsü tashi asenok tamangertem dak tangatetba alitsüla. Tang ama meimlaba tashidak wara tamajung agi amokmerendang, asenok arogo nungertemia mozü ki lapokba mapa nung temulung agüja inyak nungbo aser asenokia medical azüngertem ajungshia yaritet asübo, kodaka mulung anisüngzükla ta bilemer. Aji oda, tanga mapatem aika liaka, item ajakji menüngdak amai khen atema toktsür, tang yabo MLA-tema pei pei constituency nung Medical Inspector aser Supervisor ama kümer, pei alidak government mozü kitem reprangshia renemtsüba mapangji tang ya lir. Ibai asenok ajak atema tongpang tesashi raraba mapang ka lir, anungji tuluba nungi tilaba tashi pei pei tata teinyaktsü mapa lir, anungji Covid tashidak tongpang akoktsü asoshi senso shiai kechi inyaksü teyur, itemji zübazülema metoktsüi ajaki kanga süoki ia inyaksüla. Iba Covid tongpang ya makokyonga, nibo mesüra ozübo kecha masütsü, taküm alitsü ta shingaia mebilemstüla. Ki aser bank sünga sen bendena yur oxygen mengutet aser ngutetyonga magitet taküm atemba mapangji tang ya lir.

OLEMSABANG

Arogoi aser Laishiri yamai Clean Election nung shilem agidaktsüner

I. Meyionen Jamir

(Yashi adok nungi...)

Akhi Arogo sentsüwangshia meren-merena nübur ajaki akhümtsüba, asüngteta, tashi angaa alibato samaago, nüburtem arogoi soita aliba (arogo grip) to mali kümogo. Tsüngrem tenzükero anir Arogo menden nung alirtemi alima yimsüsür (politician) yim asüba agi asü?, tenlatenji aginü dang par küboki yiadok asü? Nisung shia pei nungdak ataloknü dang arogo dang nungi yimsüsürji tuluba kümdaktsü asü? Arogoji Ochi represent asübatelok lir. Asenok lokti nung teyimlatsü ajak agi Arogoji süra, Arogo nungi tenzükero nüburi aser talisa tamangertemi tamang katettsüsa Ochiba dangi khen memeyiptsü na? Nüburtemi joko arogo dak temulung meleme bilemstüsa akümba timtemji khen asadangti. Church as conscience keeper. Ibaya Arogo aser Laishirtemi ret-reta agitsüla. Naga nung tamanger jenjang jagi Arogo aser Laishirtemi noksa sayur ta angatetsüla. Set the benchmark of integrity, uprightness and holiness by your own words and actions and lead by example.

Tanü asen Aor yimsüngtem nung census figureji yimtak malir teimba lir, Electoral Rollji shitakba yimtakliir dang nungi teimba lir, RD household aser Administration nem House Tax agütsübakilen balala, ano Electoral Roll nung aliba kilenji balaka. Shitakba kilenji Arogo ket nung alibaji lir. Job Card holdersji shitakba yimtak telidak pur dang nungi kanga agi teimba lir. Yimtak inflated figure paikaji koba akitsü? Item inyakyim ajak election dak sendaka lir. Alima temoatsü aginü dang koda Tsüngrem tsüngdang aibelener? Alima temoatsü dang nungi Tsüngrem temoatsüji tuluba ta tamanger shia nem angatetdaktsütsüji Arogo aser Laishir teinyaktsütem lir.

Asen lokti joko sen dak dang ranglokba lokti aser senji dang ajak aser tsüngrem kümdaktsüogo. Kanga dang materialistic society kümogo. Ochishir, tangateter, shia meteter, nübur meimba nübu talang aser tetemsü süaka pa sen maliji matoktsü ta asenoki jemi tashi nung kodanga nisung tetemsü shingaia temulung ulua electioni maitsü. 'Everything is politics but politics is not everything' ta teti jembir. Anungji iba principle nung ajemdaker shinga anema masü, shinga tsütsü masü saka nübur ajungtsüasoshi Arogoi anir Election merüka agiba nung tongti shilem agitsü tangatetba lidaktsüner (this principle can shape the non-partisan participation of the church and church led movement in politics to bring about a clean election system). Laishiba nung theological perspectives on economics-ji angutsü. For example: Manna economy (Mat.6:25-34), theology of contentment (Phil.4:11; Heb.13:5); Love of money as the root of all evil (I Tim.6:10). Iba mesükba nungi Laishirtemi tamangertem nem tangatetba agütsüdaktsüner.

Arogo tenzükertem, Laishirtemano temulunger kija shiai item ya nangzükter nungbo kanga ajungtsü:

- 1). Tenangzüktepba
 - a) Party aser candidate ajak matsüngdang absolute neutrality maintain asütsü,
 - b) Election dak sentakba nung shinga nungia teyari kecha magizüktsü,
 - c) Tenoktangba liaka-meliaka kü meyong vote-bo nisa agütsütsü,
 - d) Ochi aser tesünep nung election agitsü atema nungdakba nübu tenlatsü,
 - e) Ochi aser tesünep nung election agitsü atema teti sarasademtsü,
 - f) Item teinyaktsü temulungtetba sayua küm ka jilia par kima sako temesüng songa ayutsü.
 - 2). Polling day-nü mesüra matongdang kongsa tashiyim mapatem adokdir Arogo nung lenirtemi aser Laishirtemi par kima songa aliba nisan temesüngji atsüteta bener timtem adokdak tesem jagi oa, Lai zünga, ken tena sarasadema aser sayutsüngia jajadaktsüner.
 - 3). Party worker-tem mesüra supporter-tem matsüngdang parnok tim masüba mapatem anema Arogo aser Laishirtemi lokti aser kijaia mapang nung pei tamang sayuteta Yisu Khrista tenüng nung tasü ita ola adokdaktsüner.
 - 4). ABAM-i Aor candidate ajak jar mensem akadang candidate shia nem yamai nangzükdaktsütsüla: Ni election nung takok angutsü atema Tsüngremi mulungba dang inyaksü, anungji ni-
 - a) kü opposition candidate(s) anema tim mesüi meinyaktsü,
 - b) yi mamshitsü
 - c) sen mamshitsü aser
 - d) injang, bomb mamshitsü.
- Iba kübok candidate aser party tenüng zülur sign südaktsütsü. Idakji parnok sign süaka mesüka alima asoshibo tanela lesson tangazükba kabosaalitsü ta yimlar.

(Maneni asüung adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Covid wara mapang Jharkhand nung Arogoi chiyungtsü agütsür



Jharkhand yimtiba, Ranchi nung aliba Catholic Arogoi Rajendra Institute of Medical Sciences kima chiyungtsü lema agütsüba noksa nung angur.

Ranchi, May 06 (Agencies): India anüdoklen aliba state, Jharkhand nung Catholic Arogo kati coronavirus tashidak agi shiranger anüker kinüngertem nem anogo shia chiyungtsü lema agütsü tenzükogo, ta osang ka ajanga metetdaksü.

Jharkhand yimtiba, Ranchi nung Catholic Arogoi May 4 nungi tenzükoga Rajendra Institute of Medical Sciences (RIMS) hospital kima coronavirus wara agi kongshia shiranger anepalur kinüngertem nem chiyungtsü lema agütsüdar.

Anogo shia parnok ni sunung 300 tema nem chiyungtsü angati agüja arudar, aser anogo shia nisung timba-timba nem teyari agütsü, ta putir, Theodore Mascarenhas-i metetdaksü.

RIMS hospital anasa food stalls semzüksüba mapang Ranchi nung tongti putir, Felix Topo-i, "Asen kodaker Tebui asenok dang kanga ajunger, aser Pai asenok dang ajungbaji asenoki sensakertem den lemsatepsüla, talisa tang timtemertem den lemsatepsüla," ta metetdaksü.

Parnoki agütsüba chiyungtsütem rongnung chi, menjang, an-shi, süngolio asoba

aser mineral water densema lir. Yaküm-a coronavirus wara anema India linük shibangba mapang nung kasa Arogoi kin, tamangba yimsü mesüra sobaliba kecha mebendangi timtemer ajak nem kasa teyari agüja liasü, ta tongti putirisa metetdaksü.

Ranchi nung Arogoi lenirtem, putirtem aser lanurtemi Muslim nunger aser tribals kibong 300 dak tema nem teyari agütsür.

Arogoi akokba tashi anogo aika teyari agütsütsü, kechiyong shiranger anükertemi chiyungtsü renemtsü mapang mangur, mesüra karbo senotsü agi kanga timtemer, ta parnok metetdaksü.

Putir, Mascarenhas-i, "Asenok tensa tamajung ka nung alir, aser iba wara ya süngiemtsüsa temaitsü mangur. Ajaki sorkari tuyuba tashi angatsüla, tangar anasa maotsüla aser nisung ajaki wara nungi kümzüka alitsüsa libalirotsüla," ta metetdaksü.

"Arogoi maneni sensakertem tenzüksü. Nisung tajungertem tenla tajung agütsüba ajanga dang onoki nungdakbapurtem nem teyari agütsüteter," ta pai metetdaksü.

Pai ashiba agi, RIMS hospital

ya sorkar hospital asübayong sensaker aikati iba hospital bushia arur, ibayongji parnok food stall ji iba hospital kima amenok.

"Tang tashi nungbo nisungtemi tenla agütsüba ajanga onoki teyari agütsür, iba denji külemi melungtet telok balala aser sorkaria yaritsü imlar," ta pai ashi.

"Mezüngbuba anogo- May 4 nü onoki nisung 300 shi nem chiyungtsü agüja liasü, ajisüaka onoki anogo shia nisung 2,000 nembosa chiyungtsü agütsütsü tebilemba lir. Nungdak apir onoki nüburttem tenzüksü-anogo 20 mesüra ita aika tenzüksüa akok," ta paisa metetdaksü.

May 4 nü India nung coronavirus tashidak agi nisung 3,780 süogo aser tang tashi nungbo linük nung iba tashidak agi nisung 222,000 dak tema süogo.

Nütsüng million 33 aliba state- Jharkhand nung tribal nütsüng million 9 shi lir aser state nung tribal nütsüngji shilem 26 shi lir.

Jharkhand state nung Khristan nütsüng million 1.5 lir, aser iba nungjagi shilem 50 shibo Catholic Khristantem lir.

Philippines nung police-i Pastor Dan puer jail nung puokogo

Monupii/May 06, 2021: May 05, 2021 anepdang mesangwai lia Philippines kübok Bicol region nung police-i pastor ka ki mita aoba sülen puer ogo, ta Brihostibarnü International Christian Concern (ICC) osang ajanga metetdaksü.

May 5 anepdang Brgy. San Isidro, Santo Domingo, Albay nung anepdang züngia 3:30 ako nung police aser sepa 30 shi Shannan Christian Academy telungi aitba sülen pastor ki mita repring. Pastor Dan Balucio ya Shannan Christian Academy nung administrator inyaker. Iba kidangji pastor kinüngtsü den tanur ana aser National Council of Churches nung staff tem

aika alir. Police ketdangsertemi parnok ajak kimai ludaksüba sülen ki mita repring. Barangay captain aser ketdangser ka na tesülen aruba sülen pastor nem 'search warrant' agütsü. Iba sülenji-a police-i minute 30 shi kiji mita repring.

Pastor, Dan'er kidangji prangpong, injang, grenade ka aser wako temerem ka nguogo, ta pastor nem tai tonglokja pa Santo Domingo Municipal Police Station-i anir aoba sülen Santo Domingo Municipal Jail nung puok.

Pastor apuba sülen Promotion of Church People's Response (PCPR)-i

ketdangsertem dang United Church of Christ in the Philippines (UCCP) nung Pastor, Daniel "Dan" Balucio tangsa chiokang, ta takhangba agütsüogo.

PCPR-i, "Philippines nung meimchir temeden atema inyakerem nem tiyazü nung tai tongloksür apuba ya kanga bulua ataloker. 2020 küm December 10 nüa Mandaluyong, Metro Manila nung osangbener Ann Salem apuba ajanga iba kuli sayur," ta metetdaksü.

Parnokisa court dang Pastor Dan anema benokba ken oji agienang aser pa tangsa chioktsüla, ta takhangba agütsüogo.

ANOGO ABEN TSÜNGREM DEN

Walokwatem mesüra tesendaktep?

Aser shinga mesenzüba lima aser nisung shinga malidak, ljip nungi onok anitetba Kibubaji kong lir ta parnok tashia mashi. Yerima 2:6.

Khristan yimsü Yisu Khrista den kanga anasatapa aliba aser Pa den tesendaktep nung ainba lir. Iba yimya süpaa amshitsüba tamang tesayuba ka masü mesüra temenen paitokba masü. Tsüngremi tenyaba mapa ajakji Pa temeim Pa nüburttem den lidaktsütsü atema lir.

Tsüngremi tekülemji asenoki Pa sentsüwangshi ngudaktsütsü aser Pa den apet asenok nungi telangzüba angutsü asoshi tentet, kechiaser aikati ibai yimya süpaba mapa ka, tekülem sentep nung ken atentsüba yimsü ka dang kümdaktsü. Tekülem sentepi aobaji Tsüngrem sentsüwangshia pa den ajuruteptsü nükjitung nung masü saka tekülem sentep nung metenra tangari tamanger masü ta ashitsü tsübuba agi aor aser atener. Tsüngremi tenla agütsüba yimyaji asenoki Pa nüburi, asenoki Pa dang meimba ajunga sayudaktsütsü asoshi tentet; saka aiben asenoki Pa mesüzükba aser asenok aibelenba Pa ain adokba ajema kümdaktsütsü tangatetba nung inyaker. Asenoki Tsüngrem den sensaksemettsü asoshi Pai asenok dang sarasademtsü sayu, saka aiben asenoki ibai sarasadem ajanga raksar "sarasademer" aser asen Tebu mulungjang nung kechi bilema lir aji mangai aritepa toktsür aor. Tsüngremi shirnok meimer parnok kümzüksü asoshi ozüngji tenteta ayu, saka ibai Tebu den tesendaktep yangluba lemanng masü ozüngyim lemanng kaang kümdaktsü. Tamajung nungi kümzükdak lemanng masü saka temerenshi agütsüba lemanng ka kümdaktsü.

Tsüngrem den telungjem nungi pilar tamangba yimsü mapatemji tazüngla walokwatemba lir. Yerima mapang nung nüburttemi Tsüngrem meteni walokwatemba nung temulung süa liasü. Parnok yimsü nung parnok temulung lema liasü aser parnok den Tsüngrem matenba parnok memetetti liasü. Tsüngrem meteni sarasademtsü, tekülem nung atentsü mesüra tenla agütsütsü takoktsü asü? Atangji ibai takoktsü! Khristan aika asoshi ibaji tesasatsü mapa lir. Yisu Khrista den tesendaktep makai yimsü nisung ka tesü. Kodang Tsüngrem dena lidir tepilaji tejangja asütsü.

Fulani teloki Khristan school ka nungi kaketshirtem puer ao

May 06, 2021: April 29, 2021 tsürtem atema asenoki nü Nigeria Plateau State nung sarsademtsüdi," ta paisa metetdaksü.

Khristan mission school- The King's School amakba sülen kaketshir pezü puer ao; iba sülen April 30 nü Khristan pezü nungjagi asembo jentet saka kabo mejenteti liasü saka May 1 nü chiokogo, ta International Christian Concern osang ajanga 17 jia tepsettsü, ta metetdaksü.

Para-Mallam Peace Foundation Tir, Rev. Gideon Para-Mallam-i ashiba agi, kiralongrartemi school atsü raksar compound telungi aitba sülen kaketshirtemji puer ao.

"Iba school nung tekolak, Bayo Famonure-i ashiba agi, iba tesem nungji security sepa 30 aiki aliba metetba sülen ang kiralongrartemji jena ao," ta Para-Mallam-i metetdaksü.

"Tang pua aliba kaketshir atema asenoki sarasademtsüdi. Iba dak alia Kaduna State nung aliba Greenfield university aser College of Forestry & Mechanization na nungi puer aoba kaketshirtem, Borno State nung puer aoba Chibok

Tesüiba küm ishika tsüngda linük nung school tem nungi kaketshirtem puer oa parnok melen sen akhangba ya kanga bulua atalokdar.

Yashi Nigeria Tiria twitter ajanga April 20 nü school nungi puer aoba kaketshirtem tsüraburtem den tejashi lemsatepogo.

Tiri sangdong ka ajanga, "Greenfield University nungi puer aoba kaketshirtem tsüraburtem den onoki tejashi lemsateper. Nisung puer aoba nokdangtsü aser tai maket nisungtem tepsetba anentsü atema inyakba maparen nung Federal sorkari mitkartem aser intelligence agencies ajanga Kaduna State sorkar nungita yaridar," ta metetdaksü.

OLONG PAITEP # 5804


1		2		3		4								
									5	6				
7						8				9				
				10										
	11	12	13							14			15	
		16						17						
18						19				20				
				21										
22														
				23										

- | | | | |
|--------------------------|-------|----------------------------|-------|
| TIPIEN | | LANGTSÜNGLEN | |
| 1. Tsüngremji - - - - - | - (7) | 1. Talila meshi | - (6) |
| 5. Aor tenüng ka | - (3) | 2. Tangar dang mesayui ayu | - (4) |
| 7. Ozüng renema ayu | - (6) | 3. Mit süzüka ao | - (5) |
| 9. Aonsotsü ka | - (3) | 4. Anogo semer | - (3) |
| 10. Shikong ayudak | - (6) | 6. Posang yangluba süng ka | - (5) |
| 11. Nübur balala | - (3) | 8. Mesüi anema aliba | - (5) |
| 14. Nisung shiai ajuruba | - (3) | 9. A _ _ _ zü | - (3) |
| 16. Temekong masü | - (6) | 12. Aou nungi agizükba | - (5) |
| 18. Tepok nungi alu | - (3) | 13. Rong tila ka | - (3) |
| 19. Temenen | - (6) | 15. Tenarong denang | - (6) |
| 22. Ghonda | - (3) | 17. Tsüngrem alidak | - (5) |
| 23. Tepok nung aketba | - (7) | 20. Y _ _ _ _ | - (4) |
| | | 21. Mang | - (3) |

OLONG PAITEP # 5803 TELANGZÜBA

- | | |
|---------------------------------------|--------------------------------------|
| TIPIEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. Teronem, |
| 14. Ola, 16. Talak, 17. Mazük. | 12. Sempa, 13. Jahaz. |

Noksa nung meputepi aliba 8 bushiang



TANÜBO NAI LANGZÜANG

Q. Litani Dam ya koba küm yanglua liasü?
 A. 1960 B. 1963
 C. 1956 D. 1959

_____ (Taruba adok nung onoki langzüksü)
YASHI ADOK TELANGZÜBA : Meghalaya

AO OSHI ANGAZÜKDAK:
TANÜ ANGAZÜKTSÜBA OJANG

Enok
 (v)Yutsüba (put)
 * Kütsüi aon nung metsü shitak enok.

Entok
 (v)Agien (remove)
 * Onoki yimdong nung anakawa ajak shidena entok.



NAI-A YA METETTER MA?

Olympic Games

Olympic Games ya Greece nung küm 3000 tejakdang tenzük aser aso19buba tatemlen nungi asendenshi asaya tenzük. Iba asayamung ya alima nung saisapong tetoktepba rongnung tulutiba ta züngshir, kong asaya aika benoka asayar. 8th century B.C. nungi 4th century A.D tashi iba asayamung ya küm pezü sülen Olympia nung asayaa aru, koba Peloponnese peninsula anüolen amenoka lir. Iba asayamung ya Zeus tenüng nungsa ayongzüka asayaa arua liasü. Modern Olympics mezüngbuba ya 1896 küm Athens nung asaya kong linük 13 nungi asayar 280 asaya 43 nung toktepa liasü. 1994 küm nungi tenzuka Summer aser Winter Olympic Games bendanger asayaa arudar. Iba asayamung ya küm pezü sülen yimti balala nung ayongzüka asayayonga arudar aser taküm Tokyo nung asayatsü renema lir. Tokyo nung Olympics ya taoba küm asayatsü liasü saka alima ajunga corona wara agi asüngba ajanga masayateti thinentsüsa aküm.

SUDOKU # 5847 TELANGZÜBA # 5847

7	9			1				8	7	9	3	2	1	5	6	4	8
8	1			6	4	2	9		8	1	5	7	6	4	2	9	3
6	4	2	8		3			1	6	4	2	8	9	3	5	7	1
4	8		5	6	3				4	8	9	5	7	6	3	1	2
	5	7			1		8		3	5	7	4	2	1	9	8	6
			3			4			2	6	1	3	8	9	4	5	7
		6	1	7	3				9	2	6	1	5	7	8	3	4
		8	9	2	7		5		1	3	8	9	4	2	7	6	5
7	4	6		8					5	7	4	6	3	8	1	2	9

OJANG LUTEP # 5390

KLITOT	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MPAA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
NNUG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
ISKNGÜ	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
ÜEMSI	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
SSHIA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
AONPG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MSLEETPAA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
IYANK	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
AJBUNGAT	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>

OJANG LUTEP TELANGZÜBA # 5389

**KÜMDANGA ALIBA AJANGA NISUNG KA
 PEI SASA LENDONG NUNGI JENBOR**

TAN HOPTA ATEMA - KOMA SÜLA ?

Q.Asen lima nunga Covid-19 tashidak wara agi amokmeren tialong nung assembly election agi nunga koma süla ?



Howrah (West Bengal), May 06, 2021: Coronavirus wara liaka Brihostibarnü Howrah nung aliba railway station ka nung nisungtem kanga anasatepa senzuba noksa nung angur. West Bengal nung wara nokdangtsü atema local train services anentsü.

India nung ano nisung lakh 4.12 dak Covid putet aser 3,980 asü

New Delhi, Monupii/May 06 (Agencies): India nung ano nisung lakh 4.12 dak coronavirus tashidak putetogo aser nisung 4,000 jungnüa süogo, ta Brihostibarnep Union Health Ministry data ajanga metetdaksü.

Tesüiba ghonda 24 tsungda India nung nisung 4,12,784 dak coronavirus putet aser tang tashi nungbo anogo ka kija nung tang nisung timtiba dak iba tashidak puteter. April 30 nüa linük nung nisung 4,02,351 dak iba tashidak puteta liasü.

Tesüiba ghonda 24 nungsa linük nung nisung 3,980 tashi coronavirus tashidak agi süogo aser asürtemji timbaka state 6 nungi liasü. Uttar Pradesh

nung nisung 357 asü, Karnataka nung 346, Punjab nung 182, Haryana nung 181 aser Tamil Nadu nung 167 asü. Nisung timba asüba state ji Maharashtra (920) liasü.

Tang linük nung coronavirus tashidak agi teshirangdakpur lakh 35 dak tema kumogo.

Joko tesüiba anogo 15 tashi anogo shia nisung lakh 3 tema dak iba tashidak puteta arudar aser shirangertem anepbabo tajemba kumdar.

ICMR-i ashiba agi, May 5, 2021 tashi nung samples ajak agi 29,67,75,209 tendangogo aser iba nungji Bodhbarnü samples 19,23,131 tendangba densema lir.

Tesüiba ghonda 24 tsungda

coronavirus tashidak agi asürtemji (3,980) Maharashtra nung 920, Uttar Pradesh nung 353, Karnataka nung 346, Delhi nung 311, Chhattisgarh nung 253, Haryana nung 181, Punjab nung 180, Tamil Nadu nung 167, Rajasthan nung 155, Jharkhand nung 141, Gujarat nung 133, Uttarakhand nung 127 aser West Bengal nung nisung 103 asüba densema lir.

Tang tashi nung India linük nung iba tashidak agi nisung 2,30,168 süogo aser nisung timba asüba state temji Maharashtra (72,662), Delhi (18,063), Karnataka (16,884), Tamil Nadu (14,779), Uttar Pradesh (14,151), West Bengal (11,847), Punjab (9,825) aser Chhattisgarh (9,738) state tem lir.

India nung tzüngluruwa mongpu June ita nungi tenzüksü

New Delhi, May 06 (Agencies): India nung tzüngluruwa mongpu ya ita pezü tashi lir, aser taküm-a linük south tsütsü tzüyümkümlen June 1 nungi tzüngluruwa mongpu tenzüksü, ta Brihostibarnü sorkar tongti ketdangser kati metetdaksü.

Ministry of earth sciences secretary, Madhavan Rajeevan-i twitter ajanga, "Jelia iba mongpu osang metetdaksür," ta ashi.

India weather office-i taküm tzüngluruwa mongpu tenzüksü indang official osang May 15 nü sangdongtsü, ta Rajeevan-i metetdaksü.

India nung aluyimba li

tesadang shi nungbo tzu anioka mali, anungji aluyimertemi tsük, mendi aser mejang ama tsünütsü balala züsentetsü atema June-September mapang tzünglu dak dang metaloker.

Taoba ita India weather office-i, taküm India nung tzüngluruwa mongpu nung tzünglu kanga junga arutsü aser ibaji ajanga alu nung aonsotsü kanga junga züsentetsü, ta metetdakja liasü.

Taoba ita India Meteorological Department (IMD)-i, India nung tzünglu aruba shilem 75 bo Southwest tsütsü tzüngluruwa mongpu ajanga

lir, aser taküm tzüngluruwa mongpu 'normal' asütsü, ta metetdakja liasü.

Osangbenertem senden ka nung jembidang Rajeevan-i, "Tzüngluruwa mongpu ji LPA nungi shilem 98 asütsü, aser ibaji 'normal' lir. Iba ya linük atema osangtajung ka lir, kechiyong iba ya ajanga India nung alu nungi aonsotsü jenti züsentetsü," ta metetdakja liasü.

Yaküm-a India nung June 1 nü Kerala state nung tzüngluruwa mongpu tenzüksü aser September ita nung Rajasthan nung mongpu tembanga liasü.

Rashtriya Lok Dal party Tir, Ajit Singh Covid tashidak agi süogo

New Delhi, May 06 (Agencies): Taoba mapang Union Minister aser Rashtriya Lok Dal (RLD) Tir, Ajit Singh Brihostibarnü coronavirus tashidak agi süogo; pa arrshi küm 86 liasü.

Ajit Singh dak coronavirus tashidak putetba sülen pa Gurgaon nung aliba hospital ka nung treatment tagidak lia süogo.

Chaudhary Ajit Singh ya taoba mapang Ato kilonser, Chaudhary Charan Singh'er jabaso lir. Pa Baghpat menden nungi tenetben tashi MP inyak aser Civil Aviation Minister-a inyakogo.

Ajit Singh ya Indian Institute of Technology, Kharagpur aser Illinois Institute of Technology, Chicago na nung azüngba sülen 1986 küm mezüng Rajya Sabha nung shim.

Ajit Singh temang tamajungba akümbe sülen Brihostibarnü asü, ta metetdakja par jabaso aser taoba mapang MP, Jayant Chaudhary-i twitter ajanga, "April 30, 2021 nü Chaudhary Ajit Singh dak coronavirus

puteta liasü. Pai tatem tashi iba tashidak den raraba sülen tanep (May 6) alima nungi pilaogo," ta metetdaksü.

"Pa akümüli mapang nisung aikati pa knga meima aser akhümstübuwa liasü. Yamaji pai-a ajak den tesendaktep tajung ayu aser pai nüburtem taküm jenjang ajungkettsütsü atema inyak," ta par jabasoisa metetdaksü.

Jayant Chaudhary-isa, "Asen linüki wara tamajung anema raraba tensa ka nung asür nem akhüm agütsünertemi akok tashi pei kidang dang amongtsü onoki mepishir. Asenok dang masü saka asen meketa alirtem ajak kümzüka alitsü atema wara anema tetuyubatem ajak beshitsüla, ibaji ajanga Chaudhary Sahib aser amang-sangwa methitemi coronavirus anema rarartem nem akhüm tajungtiba agütsütetsü," ta metetdaksü.

Uttar Pradesh Chief Minister, Yogi Adityanath aser SP tongti, Akhilesh Yadav na densema yimtenren lenirtem aikati Singh asüba mangyim jashi lemsatepogo.



May 06, 2021 nü Noida nung coronavirus atema mozü aser treatment dak sendakba nung BJP MP, Mahesh Kumar Sharma-i aluyimertem tentet- Bharatiya Kisan Union (BKU) lenirtem den senden amenba noksa nung angur.

Election tembangba sülen sorkari ano auya tenzükogo: Rahul Gandhi

New Delhi, Monupii/May 06 (Agencies): Tawa State/UT pongu nung assembly elections agiba osang sangdongba sülen ano maneni petrol aser diesel totzü jenjang atuba atema Centre sorkar aija Brihostibarnü taoba mapang Congress Tir, Rahul Gandhi-i, "elections tembangba sülen ano auya tenzükogo," ta metetdaksü.

Congress leniri Hindi oshi nung twitter ajanga, "Chunav khatam, loot phir shuru (election tembangogo, auyatsü ano t e n z ü k o g o) . #PetrolDieselPriceHike," ta lemsatep.

State pezü aser UT ka nung assembly election agiba mapang April 6 nungi tenzüksü May 3, 2021 tashi gari totzü

jenjang metui liasü, iba sülen anogo asemnü atonga linük nung totzü jenjang atuba atema Congress leniri sorkar aitsür.

Indian Oil Corporation, BPCL aser HPCL ama Oil marketing company temi anogo shia totzü jenjang repringhia jenjang atur.

Yaküm March ita nung Centre sorkari excise duty atuba sülen nungi tenzüksü tang tashi nung item company temi petrol litre shia nung sen 21.58 aser diesel litre shia nung sen 19.18 tuogo.

Delhi nung Petrol litre ka nung poisa 25 aser diesel litre shia nung poisa 20 atuba sülen tang Delhi nung petrol litre ka nung sen 90.99 aser diesel litre ka nung sen 81.42 agi yokdar.



May 06, 2021 nü Puducherry nung taoba mapang Chief Minister, V Narayanasamy-i Congress-DMK teloktep nungi takok angur MLA tem nem tetushi agütsüdang tangokba noksa nung angur.

Taliban-i Afghan nung osangbenertem amokmerener

Kabul, Monupii/May 06 (Agencies): Kabul nung Afghanistan itdangitertem yarir ta tai tonglokja aliba osangbener osangbenertem amokmerena Taliban-i Bodhbarnü osang ka sangdonga liasü. US sepaitem linük nungi ainshiba mapang aser ano azüdokshi tali ajurutsü südi ta tetsübu nung lia iba osang ya angashir.

Afghan osangbener shirnoki Afghanistan itdangiter busema osang abener, parnoki iba ama inyakba anenadoktsüla, mesüra timtem ajurutsü, ta Taliban odongtar Zabihullah Mujahid-i sangdong ka nung ashi.

World Press Freedom Day munger anogo ana dang lir Taliban-i amokmerenba ya Kabul nung amenoka aliba US aser Britain embassy temi aitsü.

Onoki Afghanistan nung shinga daka metaloka maliba osangbener busemer aser osangbener anema mapa tamajung inyakba aser amokmerenba, aser Taliban-i osangbener ola madokdaksütsü merangba ya onoki khukhua aitsür, ta Kabul nung US embassy ketdangsur

Ross Wilson-i tweet asü.

Osangbener atema alima nung Afghanistan ya tamajungtiba linük ka ta züngshir. 2006 küm nungi tenzüka Afghanistan nung osangbener 76 tepsetogo, ta U.N. Education and Cultural Organization ajanga ashir.

Taoba küm kisüing nunga osangbener 15 tepsetogo aser taküm küm tenzükeria Afghanistan anüdoklen media outlet nung inyaker tetsür asem tepsetogo. Islamic State telokia osangbener kar tepsetba tenüing agia lir, aser item rongnung tetsür asem ya dena lir. Osangbenertem rongnunga tetsür dak tali tenük yoker.

Tenük yoker nisung tepsetba asoshi sorkari Taliban tenüing asener, shirnoki linük tesadang ka dak tema nung yimsü asür. Saka Taliban-bo par tenüing asentsü mechi Afghan itdangiter temi item azüdokshi mapa ya inyaker, ta ashir.

Afghanistan nung osangbener anema azüdokshiba aser aibelener nem temerenishi magütsütetba atema hopta tetenzüklen Amnesty International ajanga ola adoka liasü.

Mejangjaba nisungtemi

azüdokshiba ya ajak amai bushisüingdang mesüi yutsür, ta Amnesty ajanga ashir. Nisung aika yiruogo aser osangbenertemi par mapa mechi anogoshi amai a m o k m e r e n b a , mezüingmeshiba aser merenshiba timtem ajurur. Iba ama tensa den osangbener aoka tepsettsü bushir ta tema nung osang prokshiba ajanga osangbener aika linük yutsür jena aor.

Osangbener kari telungpur indang olulu prokshir, ta National Directorate of Security tekolakba ajanga aitsüba asoshi Afghan open media advocacy telok kati mepelaba osang ka Bodhbarnü sangdonga liasü.

America nunger sepai tanüingba 2,500 nungi 3,500 tsüingta ya Afghanistan nungi taoba hopta apuso tenzü. Parnok ajak ya September 11 tashinung linük nungi ainshimar alitsü imlar.

US sepaitem anizüker omaba sülen telungpur anemara nung Afghan sorkar meyong sepaitem tarutsü tia mejangja, ta Washington nung aliba ketdangsurtemi yimjak nung shia lir.

Israel tiri opposition lenir dang sorkar tasen tentettsü ashir

Jerusalem, Monupii/May 06 (Agencies): Israel tiri opposition lenir Yari Lapid dang sorkar tasen ka tentettsü asüingdangogo, aser iba mera ya ajanga Ato Kilonser Benjamin Netanyahu-i mapang talangka yimsü asüba tatembang kati arutsü amai lir.

Netanyahu-i Mongulbar aonung ayatirm tashinung teloktem sorkar ka manitentetba ajanga Tir Reuven Rivlin-i iba telemtetba ya Bodhbarnü live television ka nung sangdong.

Rivlin-i Israel parliament nung shimoka aliba party ajunga den shisa agitepa liasü aser Lapid dak teloktep sorkar ka tentettsü maongka tajungtiba lir, ta sangdong, kechiaser parliament züngsem 120 aliba nungi züngsem 56-i taoba finance minister nungittsü nangzüka lir, ajsüsüaka majority monguteter.

"Timtem jenti liaka Knesset tamang katettsüsa sorkar ka kumtettsü asoshi Knesset züngsem Yari Lapid dak maongka lir ta ajiteteter," ta Rivlin-i ashi.

Iba mapa nungloktsüba agizüka sangdong ka nung Yesh Atid party tekolakba, Lapid-i ashiba agi, pai left, right aser centre indang sorkar ka amenokner, koba agi asenek kati ka mesempar ta sayutsü.

Saka arishi küm 57 tain Lapid-i Netanyahu den külemi sorkar nung metenzüktsü ta ashi, kechiaser ato kilonser-i mapa tamajung inyakba ken o benoka lir, ta ashir.

Lapid tebu ya cabinet minister ka liasü aser pa ya osangbener tejen aser yimten yimsüsür ka lir, aser pai sorkar ka tentettsü asoshi pa ket nung mapang hopta pezü lir.

Lapid asoshi mapa tasak süaka pai otsü yanglua Netanyahu yimsüsüba tatem kati arudaksütsü maongka lir, shiba Israel nung ato kilonser talangtiba inyaker alitsü. Netanyahu-i iba menden nung küm 15 tashi mena arur.

Lapid ya osangkaket züluba, TV anchor aser kaket züluba wadang nung takok ngua inyaka arur 2013 küm parliament-i aru. Pa indang Yesh Atid party tasenba yagi takok ngua nübuyimteteta Lapid ya finance minister inyak.

Ajsüsüaka Netanyahu tena tatongi maruteti teloktep sorkar yakta loksa. 2015 election sülen Yesh Atid telok ya opposition nung mena arur. Iba party ya secular aser middle-class nüburtem asoshi kanga nüngtugu lir, aser Netanyahu aser ultra-Orthodox party tsüingta tesendaktep tajung asoshi timtem lir aser ato kilonser dang ochimashi ken o benoka bushisüingdangba mapang pa menden nungi alua alitsüla, ta shia aru.

Küm ana tsüingta election

pezüben agia aru aser tesüsa March 23 nü agiba election nunga party temeja kati sorkar tentettsüsa takok mongutet. Netanyahu-i pa den tokteper aika den senden aiben menaka aser kodanga magiba mera agia Islamist Palestinian-Israeli party lenirtem dang teyari meshiaka tangatetep kati marutet.

Rivlin indang mapa ya timba tema-tazütsü ka dang lir, aser election agiba shia pai sorkar ka tentettsü atema party lenir shimteter. Taoba ita parliament züngsem 52-i Netanyahu ya ato kilonser asütsüla ta ashiba sülen pa nem maongka mezüingbuba agütsü. Ibajia sorkar tentettsü asoshibo menden agi mabensa liasü saka party ka nungi züngsem timtiba liasü.

Bodhbarnü shisatokden agitepa mapang Netanyahu busema züngsem 52 bloc-i Rivlin dang candidate tasen ka meshimteteti parliament dang ato kilonser ka shimtettsü atema telemtetba agiang ta shiang, ta asüingdang. Iba ama mera agiba ajanga dang Israel atema mejangjaba tensa ka nungi kumzüktsü, ta Netanyahu'er Likud party ajanga sangdong ka nung ashi.

Saka Rivlin-i iba onükji magizük aser ibaji ajanga sorkar ka tentettsü asoshi lenmang ajak mamshidangi election pongububa agütsüsa akumtsü, ta ashi.

Bodhbarnü özüing yanglur nisung 56-i Lapid busema nokdak aser pai right-wing Yamina party lenir Naftali Bennett dang tashi lemsatapa yimsü asütsü asüingdangogo. Lapid-i benokba sentong kübok tena melentepa ato kilonser mapa inyaksü aser Bennett nem mezüing maongka agütsütsü.

Bennett ya taoba mapang Netanyahu tembar liasü saka tsükchir akum, aser parliament nung par telok nungi menden tenet dang lir, saka parliament nung nübu timba nguteta sorkar tentettsü atema Lapid-i nüngdakba vote pa ket nung lir.

Netanyahu-i teloktep sorkar ka mamenoktetra pai telungjem sorkar ka atema inyaksü, kechiaser küm asem majungdang election ponguben maginer, ta taoba defence minister-i ashi.

"Telungjem sorkar ka tentettsü tang ya mapang tajung. Party ajak asoshi kishi lapoka lir," ta pai ashi.

Lapid nem sorkar tentettsü maongka agütsüba sülen Netanyahu-i Bennett aija liasü aser pai tiazü jembir, ta ashi.

"Bennett-i telungjem sorkar ka atema jembir. Ibaji nüburtem mashilen anitsü merangba ka dang lir. Pai lendong aliba left-wing sorkar ka tentetner ta ajaki meteta lir," ta Netanyahu-i aitsü.

Joshua Wong ano ita ter tepuokdak ayutsü



Hong Kong, Monupii/May 06 (Agencies): Tiananmen Square nung 1989 küm azüdokshiba bilemteta temelaba magie sentong agiba nung adenba mechi Hong Kong nung democracy activist Joshua Wong ita ter tepuokdak ayutsü obendang agütsüogo.

Hong Kong nung 1990 nungi tenzüka küm shia iba anogomung ya munga arur, saka taoba küm police-i virus mechi tenokdangba agütsü.

Ajsüsüaka activist tem densema nisung meyirijang aika adenshia liasü.

Wong densema iba sentong nung adener activist tem anema police-i ken o benoka liasü.

Arishi küm 24 tain Wong ya alimai kanga junga metetba

activist ka lir, aser pa ya national security law kübok temelaba magie lokti adenshiba nung aija tepuokdak yua lir.

Danga ken o ana nung pa ya tepuokdak ita 13.5 aser ita pezü ayutsü obendang agüja tang tashi tepuokdak lir.

Ano pa tepuokdak ita ter talila alitsü.

Tiananmen sentong nung shilem agiogo, ta Wong den ano lanur activist Lester Shum, Tiffany Yuen aser Janelle Leung nungertemi taoba Hukulbarnü nangzüka liasü.

Brehostibar obendang ya dener Shum ita trok tepuokdak aitsü aser tanüingba nisung ana ya ita pezü alitsü.

Tiananmen nung azüdokshiba bilemtetba ya Hong Kong aser Macau nung dang mungdakja liasü.

Taküma Tiananmen sentong ya public health mechi nokdang, ta ketdangsurtemi ashi.

Taoba küm sorkar anema nokdaker dak tenük yoker Beijing-i Hong Kong nung national security law benokba sülen iba sentong amungtsü mamungtsü ta terata nung lir.

Democracy busema longkak aitertemi 1989 küm April ita Tiananmen Square ya amokbanga communist China puti otsü nung yimtenren tsütsü longkak tulutiba aita liasü. Iba longkak aitba sentong ya hopta trok ali, kong nisung million aikati shilem agia liasü.

1989 küm June 3 aonung iba Tiananmen Square-i tank tem bener aru aser sepaitemi injang khalokja teka tazüing longkak aiter aika asü aser aika yirua liasü.

Iba sülen square nung nisung kata makhaset, ta ketdangsurtemi ashi. Saka iba tesem nung nisung noklang aika nungi meyirijang aika tepseta liasü, ta asadangteta jembir.

Mainland China nungbo iba tatalokba indang jembitsü memelar aser sorkaria mejembir.

Saka Hong Kong nungbo küm shia iba anogomung bilemteta Victoria Park nung nisung meyirijang aika adenshir.

Bhandari nung Block Task Force senden amen

Bhandari, Monupii/May 06, 2021 (TYO): Covid-19 tashidak tasen puteter timba akümba dak sendakba nung asadangshia jembishinütsü asoshi Brehostibarnü (06.05.2021) Additional Deputy Commissioner, Bhandari indang office chamber nung Bhandari Sub-division indang Block Task Force senden menogo.

Iba senden nung Additional Deputy Commissioner aser

Chairman, BTF, Bhandari, Tiameren Chang, NCS-i, COVID-19 dak sendakba maparen nung bendanga agüja aser nendak-nendaka nübur tenzükba asoshi BTF züngsemtem dang pelaba metetdaksü.

Border screening check gate, koba tang tenzükba inyakdaki, tekümdangtsü

meratem agitsü aser nübur kümzükba yutsütsü asoshi iba

maparen junga mittsüla, ta pai telok dang lephsia metetdaksü.


Tang atema, lapoka/amenoka aliba Covid-care centre tem ajanga nübur nüngdakba peridaksütsü asoshi achaayangtsüla ta pai ashi.

Iba senden nungsa, Sorkar ajanga lateta aliba COVID-19 SOPs aser temzüng nung nüburi akanga anidaksü asoshi ozüng agütsütsü lemtet aser iba den külemi ajak ajangzüktsü asoshi lokti kazüba tesem ajak nung tejak nembangba mask inoktsü, teka metsüktsü aser sanitizer amshidaksütsü telok bangjemtepa liasü.

Tanga State nungi arurtem indang osang BTF dang metetdaksütsü aser parnok mittsü asoshi yimtsüng tem nung tekolakpurtemi maparen achaayangtsü asoshi senden nung telok bangjemtep.

Covid-19 wara anema raratsü aser nüngdakba mapang yariteptsü asoshi lokti tentet balalai administration maneni nungita aser amalitepa inyaksü asoshi teloki lemtet.

Maneni, ADC aser Chairman BTF, Tiameren Chang-ia, tanga ama meimchir rokongba mapang nüngdakba pur nem teyari agütsütsü indang tongtibangtem nung jembia liasü aser Office nung tekolakpurtem pei pei tata tesem nung alitsü asoshi lephsia metetdaksü.



Happy 100th Birthday

IMKONGLEMLA

*Happy Birthday Oja.
Tsungremi na arishi kum 100 tashi
moatsuba asoshi Pa tenung asanger.
Na temeim akaba tetsü tajungtila ta
meteta onoki na tushir.
Tsungremi na maneni moajangma.
Chirnurtem, Semchirtem, Poonertem
aser Kinungertem.*

**Office of the
Akumen Village Council**
Akumen Village, Dist: Mokochung, Nagaland.

TEPELA LEMSATEPER

May 1, 2021 aonung Akumen yimtsüng nung yipru mopong tesashi arua yimti nung kiojen aser süngdonglidong raksatsüba takoksa aika liasü. Iba asoshi nübortem aser yimsüsürtem shisabolu aser tebilemsü agi nenneter lia, asen lenir Wb. Temjen Imna Along, Minister, Tribal Affairs & Higher Education, Nagaland, Kohima, pai relief atema sen Rs.1,00,000/- (Rupees one lakh) only yimten nem bener yokba asoshi Akumen yimteni nübortem ajak tenüng nung kanga dang pelaba lemsateper.

Sd/-
B.NEKEN LONGCHAR
Chaiman.

Sd/-
L.SOSANG LKR
Secretary.

Pelaba Lemsateper

Tawa 27th April 2021 anogo nung Tzüdikong Town küpok Teyong ward nung ki ana arongba osang angashia Langpangkong Tzükong Mongdang nungi Office Bearers Tzüdikong Town tonga alua semdanga teyari sen agütsüba atema kangasa pelar ta Tzüdikong Ad-hoc Town Committee-i (TATC) metetdaksür.

Iba den Fire Station koba Tzüdikong Town nung amenloka lir, parnok tanishiri anir mapang ajak nung service shitak agüja area nung takoksa tulu ajurutsü aliba nungi kümzüktsüba asoshi kangasa pelar ta TATC-i sa metetdaksür.

Sd/-
(L. CHUBA JAMIR)
Secretary, TATC

**OFFICE OF THE
KOHIMA CHUCHUYIMLANG KAKETSHIR TELUNGJEM (KCKT)**
Kohima - 797001: Nagaland

TENÜNGSANG AGÜTSÜR

Wb. Imkonglemla Pongener IAS (Retd.) aser Wt. Narola Longkumer, Jala ana tashi, Dr. Yangerjungla Pongener-i onük, "Identity Work of Individuals with Disparate Work Identities", Organizational Behaviour and Human Resource Management (OBHRM) Area, Indian Institute of Management, Bangalore, aser Dr. Imlirenla Pongener-i onük, "Methodology Development for Stereoselective Glycosylations", School of Chemistry and Chemical Biology, University College Dublin, Dublin, Ireland, tenati Doctor of Philosophy (PhD) narokum nguteta asen KCKT nem tenung tajung bentsür arüba atema pelaba den külemi tenungsang aser tetushi agütsür.

Tarutsü anogotem nunga Tsüngremi maneni len aniangma ta sarasademtsür.

Sd/-
Mr. Imlisunup Jamir
President

Sd/-
Miss Imkonglemla Jamir
General Secretary

**Office of the
Mongka Ilangtsür Longsa**
Mokochung 798601, Nagaland

TENÜNGSANG AGÜTSÜR

Longsa Mongka Ilangtsür mendendi ajanga tenungsang aser tetushi agütsür.

Late. Merenchibar jala Wt. Bendangtula Jamir, W/o Dr. Rongsen Dimapur, Join Registrar nungi Additional Registrar Cooperative Societies menden tongtetba asoshi Tsüngrem tenüng sanga iba sangdong ajanga tepela lemsateper.

Ano maneni anunga aliba wadang nunga takok nung len ania moajangma ta sarasademtsür.

Sd/-
Mokoktsüla
President
Mongka Ilangtsür

Sd/-
Bendanglemla
Secretary
Mongka Ilangtsür

**GOVERNMENT OF NAGALAND
DIRECTORATE OF YOUTH RESOURCES AND SPORTS
NAGALAND : KOHIMA**

No. DYRS/YS-C/4/2010-15 Dated Kohima, May, 2021

ADVERTISEMENT

Applications are invited for eligible Indian Citizens for filling the forms for the Post of Manager and Warden at the Youth Hostel, Dimapur, Nagaland, on Contract Basis for a period of 3 years which is extendable subject to work performance.

Note: The Warden will be the spouse of the Manager and will be compulsorily required to stay in the hostel where free accommodation will be provided.

The eligibility criteria for the Post of Manager and Warden are as follows:

- 1. Educational Qualification:**
Graduate in any discipline, having proficiency in English, Hindi and Local Language. Preference will be given to candidates having degree in Hotel Management/Youth Development/Master of Business Administration/Master of Social Work (MSW)/Licensed Social Worker (LSW).
- 2. Experience:**
At least 3 years working experience in the field of Hostel/Hotel Industry or running boarding schools/guest houses or retired Defence Force Officers in the rank of Major/Lt.Col./Col./equivalent rank of the Army, Navy, Air Force or retired Government Officer of Central/State Government having other working experience of youth activities.
- 3. Preference:**
Preference will be given to local candidate.
- 4. Age Limit:**
Candidate must be between the age group of 35 years to 62 years as on 1st April, 2021 and they can serve up to the age of 65 years.
- 5. How to obtain the Application Format?**
Application can be downloaded from the given link-dyrs.nagaland.gov.in
- 6. Where/Whom to submit the Application?**
The Director, Directorate of Youth Resources And Sports, Near Don Bosco Higher Secondary School, Kohima, Nagaland, 797001 or submit through e-mail to dyrs.nagaland@yahoo.com
Note: Last date of submissions of relevant documents will be the **23rd May, 2021 till 4 PM.**
- 7. Pay Scale:**
Rs. 12,000/- per month only for Manager and Rs. 6000/- per month only for Warden.

**(AKUMLA CHUBA) NCS
DIRECTOR**

Issued by DIPR

Madrid Open: Ashleigh Barty final-i iogo



Madrid, Monupii/May 06, 2021: Madrid Open tetsür kija semi final nung Australia tsür Ashleigh Barty-i Spain tsür Paula Badosa den asayaba mapang tangokba noksa ka yangi angur.

Madrid, Monupii/May 06, 2021 (Agencies):

Brehostibarnü (06.05.2021) Madrid Open tetsür kija semi final asaya nung World No. 1 Ashleigh Barty-i ayong ayonga Spain tsür Paula Badosa madak 6-4, 6-3 agi akokba sülen, asayamung final tongtetogo.

Taoba ita Charleston asayamung nung Australia tsür top seed Barty-i Paula makokba sülen, Madrid Open Semi-final nung lai Paula tsükdaktsür alitsü.

2019 French Open champion Barty-i Melbourne indang Yarra Valley Classic, Miami

Open aser Stuttgart Open nung takok anguba sülen, taküm lai iba asayamung nung title pezübuba takok angutsü teimla nung shilem agidar.

Iba asaya mezüing set nung top seed Barty-i rank 62buba Paula Badosa den kanga toktepa asaya liasü. Küm 12 nung iba asayamung Semi-final tongteteter Spain tsür rongnung Paula mezüing alitsü.

Point 4-5 nung Paula-i anaben tashi aibelenba mapang Barty-i set point tasembuba angu. Iba takok densema Red clay court nung Barty-i asaya 16 tashi atonga takok angur alitsü.

Honibarnü tetsür kija final nung Barty-i Belarus tsür seed pungobuba Aryna Sabalenka mesüra Russia tsür Anastasia Pavlyuchenkova den asayatsü.

Tebur kija Round of 16 asaya nung Dominic Thiem-i Australia nung Alex de Minaur madak 7-6 (9/7), 6-4 agi takok ngua quarterfinal-i iogo.

Kasa asayamung, tebur tarep Round of 16 asaya nung, India nung Rohan Bopanna aser pa den külemi asayar Canada nung Denis Shapovalov nati top seed tarep Juan Sebastian Cabal aser Robert Farah na akokba mapang, 2021 nung Rohan Bopanna-i ATP Tour asaya mezüing takok angu.

Iba nungtugu clay-court asayamung nung Rohan Bopanna aser Denis Shapovalov nati 6-3, 6-4 agi Farah aser Juan Sebastian tsükdakja tebur tarep quarter-final tongtogo. Tan season nung Bopanna-i mezüing Shapovalov den longjemer tebur tarep nung asayar alitsü.

Bodhbarnü indang tie masayadang, iba tour nung Bopanna-i 0-7 record yanglua lir aser nungdaka aliba asaya ka akoktsü atema Madrid nung top seed tarep asayar tsükdakja khuret tuluka pungdokogo.

Tebur tarep quarter final nung Bopanna aser Shapovalov nati Alexander Zverev aser Tim Puetz na den asayatsü.

Athlete nem Pfizer-BioNTech-i vaccine agütsütsü

New Delhi, Monupii/May 06, 2021 (Agencies): Aruya aliba Tokyo Games nung shilem agir athlete aser staff nem vaccine agütsütsü atema, Brehostibarnü, US indang mozü yangluba company tetsüti Pfizer aser iba maparen nung külemi inyaker Germany indang BioNTech nati International Olympics Committee den tenangzüktep agiogo.

Japan-i maodang iba vaccine kari (athlete aser staff) danga aginura, parnok nem mapang shitak nung mozü agütsütsü/tongtsütsü asoshi item company yagi national sporting tentetem den longjemer asüngdangya inyaktsü.

"Tokyo matongdang, shilem agitsüpur linüktem ajak dose tanabuba agütsütsü nükjidong nung, May tatemlen nungi iba games nung shilem agitsüpur linüktem nem mezüing dose agütsütsü imlar," ta sangdong ajanga metetdaksü.

Iba mapatong asoshi tenangzüktep agiba maparen ya IOC president Thomas Bach-i agizüka liasü.

"Aruya aliba Olympic aser

Paralympic Games nung shilem agitsüpur athlete aser staff tem dang alima dang tatishitsü tajung sayutsü aser iba vaccine mulungsoa agizükdaktsüner," ta Bach-i ashi.

Iba games nung athlete 11,000 dak temai shilem agitsü imlar. July 23 nungi August 8, 2021 tashi iba Games asayatsü.

Tesüiba ita ishika nungi IOC-i asayar ajunga vaccine magiyonga iba Olympics takok ngua ayongzükettsü ta nangzüka arudar.

China nungi bener aruba Covid-19 vaccine tem national delegation tem nem agütsütsü, ta taoba mapang IOC-i shiogo.

Ajisüaka, Pfizer den züingzüktepba ya tongtibang ama aniteter, kechiyong Covid-19 puteter timba akümba ajanga Tokyo aser Japan kübok tesem balala nung 'state of emergency' sangdonga lir.

Iba Games nung Japan-i bendanglen nungi arur tereprangertem nokdangtsü asoshi telemtetba agiogo aser taoba Hokolbarnü organising committee indang president Seiko Hashimoto-i, taküm To-

kyo Games ya terepranger medeni ayonga asayatsü akok aser ibaji Olympics putiotsü nung mezüing alitsü, ta shiogo.

Japan indang hospital system nung khuret agi neneter aliba mapang, iba asayamung nung Japan nung medical staff dang yariteptsü/inyaktsü asüngdangba atema Tokyo 2020 asayamung aitsüogo aser Hashimoto-i ashiba agi, terepranger medenra iba khuret pungbatsü akok.

Japan nung alir nüburtemi arendakba/shisabuluba nung telangzüba agüja, taoba hopta asayamung ayongertemi Olympic delegation tem aser media naprongla atema latettsüba anti-virus meratem akangshija liasü.

Pfizer aser Ugur Sahin mesüra BioNTech indang chairman aser CEO, Albert Bourla-i ashiba agi, onoki (firm) iba vaccine agütsütsü asoshi mulunga dang lir.

Iba vaccine melatsü/agitsü asoshi linük balala indang Sorkar telemtetba dak tuluka aket, saka iba vaccine ya EU, US, UK, Canada aser tanga linüktem Sorkar ajanga melaogo, ta tentet anapronglai metetdaksü.

Malaysia Open nung India team masayatsü

New Delhi, Monupii/May 06, 2021 (Agencies): Aruya aliba Malaysia Open Tour Super 750 asayamung nung Indian badminton team-i shilem magitsü. Iba asayamung ya May 25 nungi 30, 2021 tashi asayatsü renemer lir, saka Malaysia Sorkari mapang tatsüka atema India nungi senzüsönongertem Malaysia-i arutsü memelaba ajanga India team-i iba asayamung nung shilem magitetsüsa akümer.

Olympic qualification atema asayamung ishika rongnung iba asayamung ya India team atema tongtibang liasü.

Iba asayamung nung India team nungi single aser double

asayar talisa PV Sindhu, Saina Nehwal, Kidambi Srikanth, Sai Praneeth, Satwiksairaj Rankireddy, Chirag Shetty, Ashwini Ponnappa aser Sikki Reddy nungeri shilem agitsü renemer liasü.

Ministry of External Affairs ajanga Sports Ministry-i India team iba asayamung nung shilem agidaktsütsü asoshi Malaysia tekolakpurtem dang mepishia liasü, saka India nung Covid 19 tensa kanga mejungi aoba asadangteta, Malaysia Sorkari Malaysia nung Indian High Commission dang, tangbo India team Malaysia-i arutsü asoshi memelatsü ta osang metetdaksü.

New Zealand züingsem pezü England-i aotsü: NZC

New Delhi, Monupii/May 06, 2021 (Agencies): Tesüiba anogo ana nungi thitemer aliba Indian Premier League asayamung nung shilem agir New Zealand Test contingent indang captain Kane Williamson densema züingsem pezü tashi May 11 nü India nungi United Kingdom-i ayamesoa aotsü terenemba lir. Parnok maodang, IPL nung shilem agir New Zealand indang tanüingba asayatem Hokolbarnü (07.05.2021) pei talidaki ayamesoa aotsü, ta NZC sangdong ka ajanga metetdaksü.

June 18, 2021 nungi Southampton nung World Test Championships final India den masayadang, June 02 nü New Zealand-i England den Test series ana asayatsü.

"New Zealand asayatem mapang balala lemsar yokadoktsü asoshi onoki BCCI aser IPL franchise tem den asalentong yangluogo aser tang ama tensa tamajungdang onok timtem angateta nungita yariba asoshi tentet anaprongla dang pelaba metetdaksü," ta Brehostibarnü New Zealand Cricket (NZC) chief executive David White-i ashi.

England den Test series aser India den WTC final asaya atema renemshitsü sentong tenzüksü asoshi UK-i ayamesoa maodang New Delhi kübok mini-bubble nung Skipper Williamson, pacer Kyle Jamieson aser spinner Mitchell Santner den külemi physio Tommy Simsek nung amungtsü.

Asayar 10 densema tan IPL nung New Zealand nungi züingsem 17 agi shilem agia liasü.

"Tang India nung anena alir New Zealand Test squad indang züingsem pezü tashi

England-i jelia arudaktsütsü melaba asoshi onoki 'England and Wales Cricket Board' dang pelaba metetdaksü," ta NZC-i ashi.

NZC-i ashiba agi, NZ team indang züingsemtem takaratiba nung UK tonga arutsü atema May 11 anogo ya tetemjen alitsü.

Ajisüaka, England den Test tanabuba aser WTC final atema, June tetenzüklen külem team Test squad nung madandang, tongti fast bowler Trent Boult-i mapang tatsüka atema par adianu ajuritepi aotsü.

New Zealand nung alir Test squad züingsemtem May 16 aser 17, 2021 nü England-i ayamesoa aotsü.

"New Zealand-i aotsüpur IPL asayatem, support staff aser commentator tem den külemi, Boult densema New Delhi nungi charter flight ana rongnung ka nung mener ayamesoa aotsü aser parnok Honibarnü Auckland atongtsü," ta NZC sangdong ajanga metetdaksü.

"May 22 nü MIQ (Managed Isolation and Quarantine) nungi Boult yokadoktsü aser June tetenzüklen UK-i maodang hopta ka par kidang munga aser Mt Maunganui nung training agitsü terenemba lir," ta kasa sangdong nung shia lir.

New Zealand team trainer Chris Donaldson, shiba Kolkata Knight Riders nung dena aruogo, pa-a külem Test squad nung madandang, mapang tatsüka atema adianu den amungtsü atema kidangi aotsü.

Indian Premier League bio-bubble telungtet nung team balala asem nungi asayar pezü aser coaching staff züingsem ana dak Covid-19 putetba sülen, iba league thinena liasü.

BILEMDANGANG

"Tenüing tajungji tenükmeremeri teti raksatsütsü tasa yanglur."